



Årsmelding 2017 frå arbeidsutvalet i Ørsta idrettslag

Leiing

Årsmøtet vart halde på klubbhuset 13. mars 2017, og arbeidsutvalet (AU) vart samansett slik:

Leiar:	Erlend Andersen
Nestleiar:	Porshad Hafezi
Økonomileiar:	*
Styremedlem:	Hilde Ørstavik Lundberg
Styremedlem/skrivar:	Ingelin Fagervoll
Vara:	Hjørdis A. Vikenes og Olav Sindre Kriken

* Årsmøtet klarte ikkje å velje nokon til dette vervet. Bente Reklev skulle halde fram på overtid inntil ny kandidat kunne veljast i ekstraordinært årsmøte. Det endte diverre med at Reklev måtte halde fram i vervet heilt til neste ordinære årsmøte.

AU saman med alle gruppeleiarane har til saman utgjort hovudstyret. For arbeidsåret 2017 var det 5 møter i hovudstyret. Det var ekstraordinært årsmøte i ØIL 18. oktober (refinansiering lån, fotball).

Medlemstal/æresmedlemmer

ØIL sine grupper i 2017: Fotball, handball, friidrett, alpin, trim, langrenn, barneidrett.

Etter revidering av medlemslister frå 2017 har ein følgjande tal på medlemmer:

Born under 18 år:	790
<u>Vaksne over 18 år:</u>	<u>497</u>
<u>Totalt</u>	<u>1287</u>

Dette er ei lita auke sidan året før. Medlemstalet har vore nokså stabilt siste åra. ØIL har medlemsregisteret i KlubbAdmin, NIF sin anbefalte løysing for medlemsadministrasjon. Vedlikehald av medlemsregisteret er ei stor oppgåve. NIF har eit mål om at alle medlemmer skal administrere sin eigen medlemskap gjennom MinIdrett.

Ørsta idrettslag har gjennom åra utnemnt 21 æresmedlemmer. Desse er:

Oscar Finstad, Harald Dybdal, Leiv Rygh, Hans S. Ose, Rolf Flydal, Ingvald Hatlestad, Kåre Myklebust, Petter Homlong, Syver Hovdenakk, Geir Mo, Jarle Aarseth, Steinar Osborg, Grete Bjørdalsbakke Mo, Dagfinn Nupen, Svein Silseth, Gunnar Knutsen, Stein Aam, Arild Bjørdal, Kari Lundestad Myrøld, Helge Moe, Per Hjelle.

Representasjon

Følgjande medlemmer hadde i 2017 tillitsverv i høgare organisasjonsledd:

Erlend Andersen:	Leiar i Ørsta idrettsråd.
Egil Åmbakk:	Styremedlem i alpinksomiteen i Møre og Romsdal.

I tillegg vart Jon Olav Kriken (fotball) nytta som kurshaldar i regi av kretsen. Terje Sunde (alpin) var styremedlem i Ørsta Skisenter.

Når det gjeld representasjon til forbunds- og kretsting har gruppene sjølv oppnemnt/valt egne utsendingar.

Møter med idrettskretsen: Tre medlemmer var med på den årlege Møteplassen i Molde.

ØIL var gjennom leiar representert i møter i Ørsta idrettsråd. Vi var også godt representert i årsmøtet til idrettsrådet.

Anlegg

Klubbhuset

Klubbhuset vart rive oktober 2017, for å gi plass til den nye fleirbrukshallen. Dette var ei stor og tung sak for ØIL (les meir lenger nede).

I byggeperioden har laget mellombels klubbhus mellom Kiwi-hallen og stadion.

Ørsta stadion/kunstgrasbane

Driftsplan for anlegga i Holmane vart vedteke i ekstraordinært årsmøte 2013. Eiga anleggsgruppe skal organisere naudsynt vedlikehald på anlegga. Det var stor aktivitet på anlegga også i 2017. Anlegga vert også brukt på dagtid av skulane. Mykje nedbør og lite sol reduserte brukstida på stadion-graset. Grasbana treng rehabilitering og ny drenering.

Kunstgraset vart skifta sommaren 2016. Det gamle kunstgraset fekk leve vidare på Velle skule og Vikemarka skule.

Kombibygget

Kombinasjonsbygget (lager/tribune/kiosk) mellom stadion og kunstgrasbana var ferdig 2012. I 2016 vart det installert avfuktingsanlegg i bygget, noko som har betra innklimaet. Bygget treng utbetring på utsida, ikkje minst for å stoppe lekkasje.

Kiwi-hallen

Fotballhallen var ferdig våren 2013. Formelt er det eit eige aksjeselskap (Ørsta fotball AS) som driv hallen. Hallen er ein suksess, med stor aktivitet kvar einaste dag. På dagtid vert hallen brukt av Velle skule. Om vinteren er det leigeinntekter på hallen. Brukarane bør respektere anlegget i større grad, det er for mykje rot i hallen.

I mai vart det arrangert dans med Vassendgutane. Dette arrangementet gav gode inntekter til drift av hallen og fotballgruppa.

Lager/WC ved Kiwi-hallen

Våren 2016 vart det gamle lageret totalrenovert, og det vart bygd 4 toalett med høg standard. Golvet til Kiwi-hallen er lagra her.

Langrenn

Ved Mosmarka og framover Daleteigane/sætrevegen har langrennsgruppa gjennom fleire år gjort ein formidabel innsats for å opparbeide langrennsløyper og turstiar. Grunnen er i privat eige, noko som krev eit godt samarbeid med grunneigarane. Langrennsgruppa har sett opp lys i store delar av langrennsløypa.

Dei har også løypemaskin og garasje tilknytt dette anlegget.

Vinteren 2017 var nokså ustabil, med lite brukartid i det sentrumsnære anlegget. Langrennsgruppa har også ansvar for langrennsløypene og lysmastene på Bondalseidet. Vi får håpe brukarane set pris på det arbeidet som ligg til grunn!

Bondalseidet

På Bondalseidet er ØIL eigar/medeigar i fleire startbuder/tidtakarbuder knytt til alpint, langrenn og trim (trimrenna).

ØIL er medeigar i skisenteret.

Mange foreldre gjer ein enorm dugnadsinnsats for å drifte alpingruppa.

Økonomi

ØIL nyttar XO Rekneskap AS.

Laget prøver å få mest mogleg idrettsaktivitet for pengane. ØIL har i hovudsak bygd sine eigne anlegg. Laget har likevel relativt lite lån. Økonomien er stram, men under kontroll. Omsetnaden i 2017 var vel 7 millionar.

ØIL har låg medlemsavgift, og gruppene held treningsavgifta så låg som mogleg. Vi er rimeleg i regional samanheng, målet er at flest mogleg skal ha høve til å vere med.

Med mange anlegg vert det også store avskrivningar. Rekneskapen viser samla negativt resultat på kr. 208 000 for 2017.

Sportsleg aktivitet/aktivitet i gruppene

Ørsta idrettslag driv i utgangspunktet breiddeidrett. Dei fleste utøvarane er under 15 år.

Likevel er det gode prestasjonar av ungdom i fleire grupper. Både fotball og handball har t.d. gode gute/junior-lag.

Langrennsgruppa gjer ein framifrå jobb med utbygging og vedlikehald av langrennsløyper og turløyper, også til glede for ålmenta.

Trimgruppa sin største aktivitet er fjelltrimmen, med gode besøkstal heile året. Trimrenna om vinteren er også populære.

Barneidrettsgruppa har dette skuleåret nær 100 born med god og variert aktivitet. All aktivitet vert organisert av foreldra.

Fotballgruppa har over 500 spelarar, med meir enn 50 lag. Gruppa er ein av 19 kvalitetsklubbar i kretsen.

Friidrett har svært god rekruttering av born, men har også større ungdomsgruppe enn på mange år.

Handball har avgrensa moglegheiter i Ørstahallen, men stiller likevel nær 20 lag. Det er særleg god vekst i mini-handball.

Alpin har gode fasilitetar på Bondalseidet, og reiser heile året på samlingar til meir snøsikre anlegg. Gruppa har fått eit større miljø gjennom samarbeid med Volda, Åmdal og Sæbø.

Elles viser vi til gruppene sine eigne årsmeldingar som fortel mykje om aktiviteten gjennom året. Der er god aktivitet i alle gruppene.

Ny fleirbrukshall

Kommunen skal bygge ny fleirbrukshall på den tidlegare utstillingsplassen, tett ved stadion.

ØIL får nye klubblokale i andre høgda i hallen. Etter planen skal hallen skal stå klar november

2018. Grunnarbeidet starta sommaren 2017. Hovudstyret brukte mykje tid på denne saka også i 2017.

Riving av klubbhuset

Klubbhuset måtte altså vike for fleirbrukshallen. ØIL etablerte ei forhandlingsgruppe som skulle forhandle med kommunen om ei mellombels løysing for idrettslaget i byggeperioden. Det første forhandlingsmøtet var i mars 2017. Partane var då samde om at kommunen leiger ein klubbhus-modul for ØIL i byggeperioden.

Forhandlingane fortsette gjennom sommar og haust. Det var ikkje semje om innhald og plassering av modulen. ØIL hadde også forslag om at kommunen kunne betale til ØIL ein sum tilsvarande leigekostnaden. ØIL ville då bruke midlane til å reise eit eige sørvisbygg. Det vart ikkje semje om denne kompensasjonen, forhandlingane vart avslutta i september.

Konklusjonen ble dermed at kommunen leiger ein modul til ØIL, etter laget sin spesifikasjon. Dusj nekta kommunen å ta med i prosjektet. ØIL har tilgang til garderobe med dusj i Ørstahallen i byggeperioden.

Klubbhusmodulen vart kraftig forseinka. Først mot slutten av året var den på plass, nær 12 veker etter utflytting frå klubbhuset. Dette var ei vanskeleg periode særleg for fotballgruppa.

Tidtakar/speaker-bud vart bygd på toppen av kombibygget. Stadion vert «snudd» i byggeperioden for hallen.

Sluttord

Hovudstyret fungerte godt i 2017, det var mykje god aktivitet i gruppene. Vår visjon er "idretts glede for alle". Det viktigaste er at utøvarane har det kjekt og utviklar seg både fysisk og sosialt, og er stolte av å representere laget.

ØIL er til for medlemmane. Laget er i stor grad med på å forme lokalsamfunnet og oppvekst-vilkåra for born og unge i sentrum. Det er også mange utanfor laget som nyt godt av våre tilbod; langrenns- og turløypene, anlegga i Holmane, Kiwi-hallen, fjelltrimmen m.m.

Vi takkar fotballgruppa for nok ei svært god 17. mai-gjennomføring i sentrum.

Vi takkar næringslivet som støttar oss gjennom sponsormidlar og gåver, og andre som støttar oss økonomisk på ulikt vis.

Vi takkar også kommunen, fylket og idrettskretsen for god støtte og godt samarbeid gjennom året.

Ekstra stor takk til alle foreldre som brukar av fritida si til tillitsverv og dugnadar for laget!

Arbeidsutvalet takkar for seg og ynskjer det nye Styret lukke til.

Ørsta, 11. mars 2018.

Ingelin Fagervoll

Erlend Andersen

Bente Reklev

Hilde Ø. Lundberg

Porshad Hafezi